

Badische Landesbibliothek Karlsruhe

Digitale Sammlung der Badischen Landesbibliothek Karlsruhe

Proserpine

Lully, Jean-Baptiste

Paris, 1680

Widmung

[urn:nbn:de:bsz:31-140576](https://nbn-resolving.org/urn:nbn:de:bsz:31-140576)



AV ROY



SIRE,

*Je doy tout ce que je suis à VOSTRE MAJESTE',
& je ne puis me dispenser de luy consacrer tous mes Ouvrages.
J'espere, SIRE, que vous recevrez favorablement celuy
que je vous presente, puisqu'il a déjà eü le bon-heur de vous
paroistre agreable, & que vous avez bien voulu luy donner
une aprobaton glorieuse, qui a esté suivie des aplaudissemens
de toute la France. Cèt avantage est le plus grand que je me
pouvois proposer pour le prix de mes travaux, & quoy que
VOSTRE MAJESTE' m'ait comblé de mille graces,
qui m'obligent d'avoir une reconnoissance éternelle, j'oseray luy
dire que je suis encore plus touché de ses loüanges que de ses
bienfaits, & que je n'ay iamais rien resenty si vivement que
la ioye d'avoir pü luy plaire. C'est à vous-mesme, SIRE,*

que ie suis redevable du succès qui suit tousiours ce que ie
compose pour vos Divertissements ; La Musique est un Art
renfermé dans des bornes si estroites, & il y a si long-temps
que i'y traueille, qu'il seroit impossible que mon foible genie
ne fût entierement espuisé, s'il n'estoit ranimé par cette ar-
deur inconcevable que vous inspirez à tout ce qui est employé
pour vostre service, & qui ne fait rien entreprendre qu'elle
ne fasse achever heureusement. Je doy l'avoüer, **SIRE**,
I'ay un secret infailible pour trouuer de nouvelles forces, &
pour m'eslever au dessus de moy-mesme, c'est de considerer que
les Concerts que ie prepare seront entendus de **VOSTRE**
MAJESTE', & que ie doy m'efforcer de les rendre dignes,
s'il est possible, de l'attention du Vainqueur de mille Nations
differentes, du Pacificateur de l'Europe, de l'Arbitre souverain
du Monde. Ce n'est pas mon dessein, **SIRE**, de m'engager
temerairement à toucher à vostre Eloge : Je sçay que c'est pour
un autre Art que le mien qu'est reserué l'honneur de parler
de vos Actions Heroïques : C'est bien assez pour moy d'offrir
des Chants nouveaux pour ayder à celebrer Vostre Gloire, &
ie dois estre trop satisfait qu'il me soit permis de me servir
de l'occasion du present que ie vous fais de **PROSERPINE**,
pour vous protester que ie suis,

SIRE,

DE VOSTRE MAJESTE',

Le tres-humble, tres-obeïssant, &
tres-fidelle Serviteur & Sujet,
JEAN-BAPTISTE LULLY.